

Հ. Գ. Գրիգորյան

ԵՐԵՄՆԱԿԱՆ ԹՎԱԿԱՆՆԵՐԻ ՍՓՅՈՒՌՔԱԶԱՅ ԳՐԱԿԱՆ ԶԱՐԹՈՒՔԸ

1917 թվականի Հոկտեմբերյան ուժեղացող սկսվեց երկու հակադիր հասարակական սխտեմների՝ կապիտալիզմի և սոցիալիզմի պայքարի դարաշրջանը, սոցիալիստական ուժերի հաղթանակների և ազգային ազատագրական ուժերի կործանների, իմպերիալիզմի խորտակման և դեպի կոմունիզմ ընթացող մարդկության հաղթարշավի մեծ դարաշրջանը:

Այն իր խորը կնիքը թողեց մարդկային մտքի և ստեղծագործության ամբողջ հետագա ընթացքի վրա:

Գրականությունն ու արվեստը ևս, ինչպես դաշտապարտության ամեն մի արտահայտություն, ավելի խիստ սահմանափակում էին երկու հակադիր ճակատների վրա՝ հետադիմական ու առաջադիմական: Մի կողմում այն արվեստագետներն էին, որոնք ձգտում էին շրջանցել շրջապատող կյանքը, շնկատել այն, և դրանով իսկ իրենց արվեստը ծառայեցնել հասարակական գիտակցության բնագծման գործին: Մյուս կողմում նրանք, ովքեր ձգտում էին իրենց արվեստը ծառայեցնել մարդկային կյանքի պարզացման, աշխարհի վերափոխման գործին: Սփյուռքահայ գրականությունն էլ ունեցավ պարզացման նույն պրոցեսները:

Սփյուռքահայ գրական նոր սերնդի ներկայացուցիչներից էին «Մենք» հանդեսի շուրջը համախմբված գրողները՝ Շահան Շահնուր, Կազեմ Շուշանյան, Զավեն Որբունի, Բյուզանդ Թոփալյան, Արշամ Տատրյան, Նիկողոս Սարաֆյան և ուրիշները: Թե՛ քաղաքական իրենց հայացքներով, թե՛ գրական կարողություններով, թե՛ ընդհանուր պարզացմամբ, տարրեր մակարդակի ու տարրեր խառնվածքների մարդիկ էին նրանք: Սակայն տարրեր որակի ու խառնվածքի այդ մարդկանց ստեղծագործության մեջ կար ընդհանուր մի դիմ, որը և, գոնե սկզբնական շրջանում, նրանց միավորել էր հասարակական-գրական նույն ուղղության մեջ, դա՛ սեփական ճակատագրի և միևնույն հուզող հարցերի ընդհանրությունն էր, որ ընդգծվածորեն արտահայտվում էր նրանց առաջին գործերում:

Մի սերունդ էր այդ, որ սփյուռքահայ իրականության մեջ ստացավ «անպատի սերունդ» անունը: Իր ճակատագրով և իր հիասթափություններով դա նույն պատերազմից վթարված և արևմտյան գրականության մեջ ձկորած սերունդ» կոչված երիտասարդությունն էր, որի ընդհանուր հուսախաբությունը պատերազմից առավել խորանում էր իր ազգային ողբերգությամբ: Դա այն երիտասարդությունն էր, որի մանկությունը թունավորված էր թուրքական ահավոր ջարդերով: Շատերի պատանեկությունը անցել էր որբանոցային անուրախ մթնոլորտում, իսկ երիտասարդությունն՝ օտար երկնակամարների տակ, անհյուրընկալ ու հաճախ թշնամական միջավայրում: Հայրենի երկրի կարոտը և իրենց շրջապատող օտար ու անհյուրընկալ միջավայրը ծնում էին նրանց մեջ

ծայրահեղ հուսահատություն և անկումի տրամադրություն, որն իր ուժեղ կնիքը պիտի դնէր նրանց ստեղծած դրականության վրա:

Այդ սերնդի ամենատաղանդավոր ներկայացուցիչը հանդիսացավ Վազգեն Շուշանյանը: Իր պատմվածքներում, վիպակներում, օրագրային խորհրդածու-
թյուններում Վազգեն Շուշանյանը խոր հուզականությամբ պատմեց «անապա-
տի» իր սերնդի դառը ճակատագիրը, նրա «մթին պատանությունն» ու կյանքի
ողբերգությունը:

Վազգեն Շուշանյանի ամբողջ ստեղծագործությունը դառնացած հոգու մի
ձիչ էր՝ հուսահատություն, ընդվզումի ու բողոքի կանչ: Նրա հերոսների մեջ
ուժեղ է ապրելու տենչը. պատրաստակամություն կա կռվելու, պայքարելու հա-
նուն կյանքի, բայց նրանց անձանոթ են պայքարի ուղիները, նրանք չեն տես-
նում պայքարողների մեծ բանակը, չեն կարող միանալ այդ բանակին: Ուստի
և միայնակության դառը զգացումը սպանում է նրանց մեջ ըմբոստության ոգին
և նրանք հաճախ անձնատուր են լինում էժանագին սիրո հաճույքներին: Սա-
կայն դրա կողքին Վազգեն Շուշանյանը խստորեն դատապարտել է կապիտա-
լիստական իրականությունը, նրա զվվելի բարքերը: Նա ծանր ու դառը խոսքեր
է ասել մտավորական այն խավի նկատմամբ, որը ծառայում է դրամատերերի
դասին և «կը դյուրացնէ իր մեղսակցությամբ» նրանց անազնիվ գործերը:

Մինչև 1932 թվականը Վազգեն Շուշանյանը ունեցավ խոտորումներ, հարեց
ազգայնամոլ, ճղճիմ ու նեխված իրականությունը: Սակայն ազատագրվելով
երիտասարդական իր մոլորություններից, նա խստապես քննադատեց ու մեր-
կացրեց դաշնակցականների արատավոր ու կործանիչ էությունը: Հասկացավ,
որ «արդարության ու նոր կյանքի խոստումը» «Վլադիմիր Իլյիչի ուղեղին մեջ է»:

Նա մեծ հպարտությամբ էր խոսում իր վերածնված հայրենիքի՝ Սովետա-
կան Հայաստանի մասին՝ «...որ իր ապագան կկերտե իր սեփական ուժերով:
Ամեն ինչ ճիգ է ու խոյանք ... ուր կյանքի իրական արժեքները պատվի են...»:

Դժբախտաբար նա շարժանացավ իր հայրենիքը տեսնելուն: Կարճատև
եղավ Վազգեն Շուշանյանի կյանքը:

1929 թ. Փարիզում համարյա միաժամանակ լույս տեսան Ջավեն Որբուն-
ու «Փորձ» և Շահան Շահնուրի «Նահանջ առանց երգի» վեպերը:

Ջավեն Որբունու (Էոքսուլյան) վեպը նվիրված է հայրենի երկրից պոկված
սփյուռքահայերի կյանքի նկարագրությանը: Օտար միջավայրում մի կտոր հաց
որոնելով է սկսվում հայ ընտանիքի քայքայումը, նրա բարոյական և հոգեկան
անկումը: Մերկացնելով կապիտալիստական իրականության գազանային էու-
թյունը, նրա դասակարգային հակասություններն ու անտազոնիզմը, Ջավեն Որ-
բունին չի տեսնում, սակայն, այդ դրությունից դուրս գալու որևէ ելք. նա անօգ-
նականորեն միայն արձանագրում է դրության ողբերգությունն ու անկյանելիու-
թյունը: Սրա մեջ է Ջ. Որբունու վեպի թուլությունը: Վեպը կազմում է նաև իր
կառուցվածքի և զեղարվեստական վարպետության տեսակետից:

Միանգամայն այլ էր Շահան Շահնուրի «Նահանջ առանց երգի» վեպի
հանգամանքը: Արտահայտելով սփյուռքահայ այդ սերնդի անհուսության տրա-
մադրությունները միաժամանակ դա խիստ պրորլեմային մի երկ է՝ լայն ընդհան-
րացումներով ու արդիական: Այն տազնապ է ձուլման և ապազգայնացման
վտանգին ենթակա հայ երիտասարդության ճակատագրի վերարերյալ: Այդ երի-
տասարդությունը նախանջում է առանց երգի, առանց խնդության: Նա հաս-
տատ քայլերով դեպի անխուսափելի կործանում է, ընթանում: Վեպն ընդունվեց

որպես ահազանգ, որը գործի է կոչում՝ հանուն այդ երիտասարդության փրկության:

1933 թ. Շահան Շահնուրը հրատարակեց «Հարալեզներու դավաճանությունը» պատմվածքների ժողովածուն, ուր նա հանգում է այն մտքին, որ գաղթաշխարհի հայությունը կգտնի իր փրկության ճամփան, երբ ազատագրվի «դաշնակցության թուլնից», և երբ, բացվեն նրա առաջ Հայաստանի դռները: Սա արդեն մի քայլ առաջ է «Նահանջ առանց երգի» գրքի հոռետեսության համեմատությամբ: Դժբախտաբար, ծանր հիվանդությունը մշտապես մահճակալին է գամել տաղանդավոր գրողին, նա երկար տարիներ այլևս ոչինչ չստեղծեց: Վերջին տարիներին Շահնուրը նորից հանդես է եկել, բայց արդեն որպես ֆրանսագիր հեղինակ՝ Արսեն Լյուրեն կեղծանունով: Ֆրանսերեն լեզվով նա հրատարակել է բանաստեղծությունների երկու ժողովածու (1946 և 1951 թթ.) և արձակ էջերի մի ժողովածու (1956 թ.): Վերջին գործը արժանացել է ֆրանսագիր օտարազգի արձակագիրների Ռիվարոլի մրցանակին:

Անհրաժեշտ է այստեղ նշել նաև հետևյալ ուշագրավ հանգամանքը: XIX դարի երկրորդ կեսի և XX դարի ամբողջ առաջին քառորդի հայ հասարակայնությունը, ինչպես և գրական գործիչներից շատերին, հուզող կենտրոնական հարցը եղել է հայ ազգային-ազատագրական պայքարի, նրա մեջ մասնակցող ուժերի, այդ պայքարի տակտիկայի ու մեթոդների հարցը: Գոյություն ունեցող վեճերում երկրորդական տեղ չէր զբաղում, իհարկե, նաև դաշնակցություն, նրա արկածախնդրական գործունեության ու կործանարար դերի գնահատականի հարցը: Բնական է, այդ ամենը պիտի հուզեին նաև «Մենքի» շուրջը խմբված երիտասարդությունը:

Հայրենի երկրից վոնդված ու արտասահմանում ծվարած կովկասահայ դաշնակցական լիգերները իրենց հուշերում, հողվածներում և հրասպարակային ելույթներում կաշվից դուրս էին գալիս պատմության առաջ արդարացնելու կամ փառարանելու իրենց նախորդ կործանարար գործունեությունը: Մասնավորապես նրանք ամեն միջոց գործադրում էին հեղափոխական ոռոմանտիկայի փառքի պսակով վարդարելու բացարձակապես արկածախնդրական ու իրենց արդյունքներով շատ ողբերգական հայդոկային ու կամավորական շարժումները: Սակայն շատ հեռու լինելով կոմունիստական մտայնությունից, հաճախ (հատկապես սկզբնական շրջանում) թշնամական դիրք ունենալով դեպի այդ շարժումը, «Մենքի» առաջադեմ երիտասարդների մի մասը կարողացավ ճիշտ կողմնորոշում ունենալ դեպի դաշնակցությունը և խիստ քննադատական մոտեցում ցուցաբերել դեպի նրա անցյալն ու ներկան:

Իր «Պայնուզլըները» պատմվածքում Շահան Շահնուրը գեղարվեստական մեծ վարպետությամբ ու համոզականությամբ պեկում է «հեղափոխական ոռոմանտիկայի ու հերոսականության» պսակը կամավորական շարժման «հերոսների»՝ «որդիք որոտմանների» վրայից, ցույց տալով, թե ինչպես երբեմն այդ շարժման մասնակիցները կատարել են հակաժողովրդական ու հակամարդկային, անասնական արարքներ:

Փաստորեն «Մենքի» երիտասարդների գրական այդ երկերը տուժած սերնդի ներկայացուցիչների ընդվզումի մի արտահայտությունն են ընդդեմ իրենց ապիկար ու դավաճան ղեկավարների և նրանց խարերայական ու դատարկ խոստումների: Ղեկավարների ու տուժածների՝ երիտասարդ սերնդի միջև հասունացող կոնֆլիկտի մի արտահայտությունն էին այդ գործերը:

Սակայն այդ ըմբոստությունը, վերջին հաշվով պասսիվ, կրավորական բնույթի է, տիրապետողը այնտեղ ավելի ղգացմունքներն են քան միտքը: Գիտակցականը խորապես զիջում է ղգայականի առջև: Վազգեն Շուշանյանը պիտի դուրս գար դաշնակցության շարքերից, պիտի քննադատեր քաղաքական այդ արկածախնդիրներին, սակայն պիտի մնար միայնակ ըմբոստի դերում, առանց գտնելու այն ուժը, որը կարող էր հակադրվել սփյուռքահայ ազդայնամուլ շարժումին: Այդ պատճառով էլ նրա պայքարը չէր կարող տալ ցանկալի արդյունքներ և նրան պիտի մղեր հուսահատության գիրկը:

«Մենքի» շարժումին անմիջապես չի մասնակցել, բայց նույն «անապատի սերունդի» գրականության տիպիկ ներկայացուցիչներից է նաև Հրաչ Զարդարյանը, որն իր ստեղծագործության մեջ կյանքը դիտում է մոայլ գույներով և ոչ մի լուսո կամ հույսի շող չի տեսնում այնտեղ: Իր մտածողությամբ էլ նա շատ հեռու մնաց առաջադեմ մտայնությունից: Սակայն ի պատիվ իրեն պետք է ասել, որ վերջին շրջանում նա կարողացավ հասկանալ ու ճիշտ գնահատել Հոկտեմբերյան ռևոլյուցիայի առաջատար դերը մարդկության ու հայ ժողովրդի ճակատագրի համար: «Մարդուն պատմությունը, երկրակնդի վրա,— գրում է Հ. Զարդարյանը,— կը բաժանվի երկու ավագ գլուխներու,—

Մինչև հոկտեմբեր, 1917

եվ 1917, Հոկտեմբերեն հետո...

Ու խղճի տեր որևէ հայ, ուր ալ ըլլա, մինչև սպառումը ժամանակներուն, հավետ անփոխարինելի երախտապարտությամբ միայն կրնա անդրադառնալ ուս առաջադեմ հանճարի այս հաղթանակին, որուն կը պարտի իր կյանքը, կյանքը իր ժողովրդին, կյանքը իր մշակույթին, կյանքը հայ անունին ու նաև ... կարելիությունը իր պատմական առաքելության»:

* * *

1930 թ. հունիսին Միսաք Մանուշյանի և Ա. Սեմայի նախաձեռնությամբ Փարիզում կազմակերպվում է «Ֆրանսահայ նորագույն գրողների ընկերությունը», որը լույս է ընծայում «Ջանք» պարբերականը: Այս սփյուռքահայ գրական զարթոնքի մի այլ արտահայտությունն էր:

«Ջանքի» երիտասարդությունը գաղափարական և գեղարվեստական իր հայացքներով հիմնովին տարբերվում էր «Մենքի» երիտասարդությունից: Հուսահատությունն ու անուրախ իրականությունը չէր նետում այս երիտասարդությանը դեպի հոռետեսության գիրկը:

Երիտասարդների այդ խումբը գրականության մեջ կատարած իր առաջին քայլերից հարեց գրական այն առաջադեմ ուղղությանը, որի ներկայացուցիչները գիտակցում էին գրողի դերն ու դիրքը ժողովրդի կյանքում:

Ակտիվ վերաբերմունք դեպի կյանքը՝ ահա նրանց նշանաբանը: Այդ ակտիվ վերաբերմունքն էլ մղում էր նրանց դեպի պայքար: Հստակ էր դարձնում նրանց քաղաքական հայացքները:

Դեռ դարիս սկզբին, պրոլետարական հեղափոխության շարժման սկզբնավորման առաջին իսկ տարիներին հայ գրականության մեջ առաջացել էր այդ շարժման գաղափարաբանության ազդեցությամբ վարզացող հեղափոխական նոր գրական հոսանքը, որը ղլխավորում էին բոլշևիկ հրապարակախոս-գրականագետներ Ստեփան Շահումյանը, Սուրեն Սպանդարյանը, բոլշևիկ-բանաստեղծ Հակոբ Հակոբյանը:

Բանլւր դասակարգի հեղափոխական պայքարի տրամադրություններն էին արտահայտում որոշ շափով նաև Շուշանիկ Կուրդիյանը, Դանիել Վարուժանը, Ռուբեն Սևակը և ուրիշները:

Առաջադիմական գրականության այդ առողջ ավանդները նոր ուժով հնչեցին և նոր սոցիալիստական որակ ստացան Հոկտեմբերյան Մեծ ռևոլյուցիայի առաջին իսկ տարիներին: Հակոբ Հակոբյանը, Վահան Տերյանը, Եղիշ Չարենցը հանդիսացան սոցիալիստական նոր գրականության առաջին հիմնադիրները հայ իրականության մեջ: Այդ նոր պրականության առողջ ավանդներով զարգացավ ամբողջ սովետահայ գրականությունը:

Իրական այդ նոր ուղղության հետևության մը էր իր առաջին գրական վճատ քայլերն սկսում «Ջանրի» գրական այս սերունդը:

«Ջանք» ամսագրի, Մ. Մանուշյանի և Ա. Սեմայի հիմնած «Նորագույն գրողներու ընկերության» առաջին քայլերը, ինչպես և իրենց այդ տարիների ստեղծագործությունը շատ երբերուն էին, տարտամ, գրված էին զգալիորեն պակաս գրական վարպետությամբ: Սակայն կարևորն ու էականը, հենց առաջին քայլերից, նրանց առողջ արմատներն էին, որ արդեն մոտակա տարիներին, նշանակալից զարգացում ստացան:

1935 թ. Միսաք Մանուշյանը հիմնում է իր խմբագրությամբ «Ջանգո» բանվորական թերթը, իսկ Ա. Սեման՝ «Մշակույթ» գրական հանդեսը: Դա Զրանսիայում դեմոկրատական ու բանվորական շարժման հզոր վերելքի տարիներին էր, երբ ժողովրդական ճակատը կարողացել էր միավորել երկրի բոլոր դեմոկրատական ու առաջադեմ ուժերը ընդդեմ հետապիմության ուժերի:

Իրենց գրական գործունեության առաջին իսկ քայլերից Մանուշյանն ու Սեման վստահ ու տիրաբար հաստատում են սփյուռքահայ ռևոլյուցիոն նոր պոեզիայի հիմքերը: Միսաք Մանուշյանն իսկական ռևոլյուցիոն տրիբուն էր: Որպես բոցաշունչ հրապարակախոս, իր կյանքի մեծ մասը նա նվիրաբերում է ռևոլյուցիոն գաղափարների պրոպագանդին: Նա բանաստեղծություններ քիչ էր գրում, բայց այդ սակավաթվի մեջ էլ ուժգնորեն հնչում է ռևոլյուցիոն մարտիկի ձայնը, որ ժողովրդական մասսաներին զգոնության է կոչում: Իր բանաստեղծություններում նա պայքարի է մղում ֆաշիստական խավարամուլության, կապիտալիստական շահագործման դեմ, վստահությամբ պրոպագանդում է կոմունիզմի պայծառ գաղափարները: 1933 թ. Գ. Դիմիտրովին նվիրված իր բանաստեղծության մեջ նա գրում էր.

Երբ քեզի նման կան անզուգական մարտիկներ հզոր,
Պայքարն ընչազուրկ մեր դասակարգին՝ ընդդեմ կամակոր,
Հարստահարող ու միշտ գիշակեր կապիտալիզմին,
Անպայման կառնե կոմունիստական կյանքի լույս դափնին¹:

Իր բանաստեղծություններում Մանուշյանը գովերգել է բանվորների ազնիվ ու համեստ աշխատանքը, գործազուրկների անլուր տառապանքներն ու բարոստությունը, նրանց պայքարը հանուն սոցիալական արդարության:

Ուշագրավ է Միսաք Մանուշյանի վերաբերմունքը դեպի հայրենասիրության հավերժական մոտիվը: Հայրենիքի կարոտը սփյուռքահայ գրողներից

¹ Միսաք Մանուշյան, Իմ երգը, Երևան, Հայպետհրատ, 1955, էջ 74:

շատերին հաճախ մղել է ազգայնամոլության և նեղ ազգայնականության: Միսաք Մանուշյանը շատ ջերմ հայրենասեր էր, սակայն Լորենց Նրա մոտ այդ մոտիվը հիվանդագին բնույթ չի սաացել: Ընդհակառակը, զաղութահայ աշխատավորությանը նվիրված իր «Արթուն կեցեք» բանաստեղծության մեջ նա զուշացնում է ազգայնամոլության թույնի վտանգից, բացատրելով, որ այդ թույնը «ի շահ իր եսին» սերմանողները աշխատավորության դասակարգային թշնամիներն են, որ ազգամիջյան «ցեղային» ատելություն սերմանելու ճանապարհով, ուզում են ջլատել բանվոր դասակարգի ինտերնացիոնալ համախմբվածության ուժերը:

Առաջադեմ, ռեույուցիոն մոտիվներ էր արտահայտում իր ստեղծագործության մեջ նաև Ա. Սեման, նա կոմունիստ չէր. իր ստեղծագործության շատ վաղ շրջանում արտահայտել է նաև որոշ հուսահատական տրամադրություններ: Սակայն հետագայում նա մեկընդմիջտ ազատվեց ամեն տեսակի անկումայնությունից և պայծառ ապագայի ձգտումը դարձավ նրա միակ հավատո հանդանակը:

Կրարձրանա սրտես վեր ու կհպվի հոգիիս

Մանկութենես հուշ մը հին, բայց չի հուզեր հիմա դիս.

Քանզի նոր կյանքն է ձրգած արմատներն իր սիրտս խոր²:

1936 թ. նա հրատարակեց «Զրահավոր դարուն» խորագրով բանաստեղծությունների իր ժողովածուն, որտեղ գովերգում է ստրկացածների պայքարը հարստահարիչների դեմ, կոչ անում գրականությունը դարձնել լավագույն կյանքի համար մղվող պայքարի զենք՝ մերժելով արվեստի արվեստի համար տեսության ջատագովներին:

Նա շատ ջերմ սիրով կապված էր իր նոր հայրենիքին՝ Սովետական Հայաստանին, դատապարտել է նրա բոլոր թշնամիներին, այդ թվում նաև դաշնակցականների ազգակործան գործունեությունը:

Ա. Սեման բոցաշունչ տողեր է նվիրել իսպանական ժողովրդի՝ իր ազատության համար ֆաշիզմի դեմ վարած հերոսական պայքարին:

Առհասարակ նրա ստեղծագործությունը նոր շրջանում ուղղված է եղել սոցիալական անարդարության և բռնակալության դեմ: Անդամ պատմական թեմային դիմելիս նա պատմությունը ծառայեցրել է ազատատենչ իր գաղափարների քարոզին, ինչպես «Շամիրամ» ողբերգության մեջ:

Մ. Մանուշյանի և Ա. Սեմայի խմբին հետագայում հարեց նաև Լասը (Լուիզյա Ասյանյանը):

Նրա պատմվածքները, ինչպես և 1936 թ. լույս տեսած «Հարցականի ուղիներով» վեպը խորասլես տողորված են հասարակական առաջադեմ զաղափարներով: Նա կծու հումորով ծաղրում է և իրանահայ և ֆրանսահայ քաղքենիներին, ռուսական սպիտակ զվարդիականներին՝ ամեն տեսակի իշխանների ու կոմսերի, որ խղճուկ վտարանդու կյանք վարելով Փարիզի տականքների մեջ, խեղկատակ դառանցանքներով երազում են իրենց նախկին փառքի վերականգնման մասին:

Նա Սովետական Հայաստանի պայծառ իրականության մեջ է տեսնում սփյուռքահայ զանգվածների փրկության ուղին: Լուիզյա Ասյանյանի հերոսները

2 Ա. Սեմա, Զրահավոր դարուն, Փարիզ, 1936:

հանձին Սովետական Հայաստանի, տեսնում են իրենց վերածնված հայրենիքը, ուր և վերադառնում են, որպեսզի նոր կյանք սկսեն:

«Քացվել է արդեն նոր մի դար,— ասում է վեպի հերոսներից մեկը,— ու այդ նոր դարի ոսկի դռների առաջ կանգնել է նոր մարդը: Նա ճեղքում է տափնապար կյանքի... Բոլորն արդարև բարձրացրած դեի դեմ: Հոգիները նոր ափ են դուրս դալիս հիմա: Նոր ափ է դուրս գալիս և մեր հոգին՝ հայի հոգին»³:

Բնորոշ է, որ սփյուռքահայ գրականության մեջ նոր ունույնացիոն շունչ մտցնող այս երեք առաջամարտիկներն էլ շատ կարճատև կյանք ունեցան, որովհետև գրող լինելուց բացի նրանք մարդկության ազատության համար պենքը ձեռքներին պայքարող անձնվեր մարտիկներ էին և գոհվեցին ֆաշիզմի դեմ մղվող մեծ մարտերում:

Ա. Սեման գոհվեց 1940 թ. Հյուսիսային Ֆրանսիայում՝ Ֆլանդրիայի ռազմաճակատում, ընդամենը երեսուն տարեկան հասակում:

Լուիզա Ասլանյանը Ֆրանսիայի օկուպացիոն տարիներին Ֆրանսիայի լավագույն գավազների՝ կոմունիստների շարքում պայքարեց Ֆրանսիայի ազատագրման համար, եղավ Ֆրանսահայ դիմադրական շարժման ղեկավար գործիչներից մեկը: Ակտիվ գործունեություն ծավալեց ընդհատակյա գրականության տպագրման և տարածման ուղղությամբ:

1944 թ. հուլիսին նա իր ամուսնու հետ միասին ձերբակալվեց, ուղարկվեց համակենտրոնացման ճամբար, ուր և սպանվեց:

Ֆրանսիայի ազատագրական պայքարի ամենաաչքի ընկնող ղեկավարներից ու հերոսներից էր Միսաք Մանուշյանը, որին ֆաշիստները 1944 թ. գրեղականահարեցին իր 22 ընկերների հետ միասին: Գնդակահարությունից առաջ Մանուշյանը իր կնոջը՝ Մելինե Մանուշյանին ուղղված նամակում գրում է. «Մի քանի ժամից հետո այլևս չեմ լինելու այս աշխարհում: Շուտով, այս կեսօրից հետո՝ ժամը 15-ին կգնդակահարվենք ... Ծն մտել էի Ազատության բանակի մեջ որպես կամավոր զինվոր և մեռնում եմ երկու մատ հեռու հաղթանակից և նպատակից: Երջանկություն նրանց, ովքեր այնտեղ ապրեն մեզանից հետո և պիտի վայելեն վաղվան խաղաղության և ազատության քաղցրությունը»⁴:

Այդ շրջանի գրականության աչքի ընկնող ներկայացուցիչներից է նաև ամերիկահայ գրող Կարապետ Սիտալը, որի «Գիշերեն մինչև լուսաբաց» գիրքը լույս տեսավ 1931 թ.:

Գրքի խորագիրն ինքնին արդեն խորհրդանշում է նրա նոր որակը: Կ. Սիտալը պատկանում է արևմտահայ գրողների ավագ սերնդին: Գրական իր առաջին քայլերը նա սկսել է դեռևս 1911 թ. Այն ժամանակ նա ավելի շատ վրադվում էր ժողովրդական բանահյուսության նմուշների հավաքմամբ և մշակմամբ: Սակայն, դրա հետ միաժամանակ, իր ինքնուրույն ստեղծագործության մեջ նա որոշ տուրք է տվել նաև ազգայնական տրամադրություններին: Հետագայում իր ստեղծագործության այդ ամբողջ շրջանը Կ. Սիտալը կոչել է «մի կյանքի գիշերը» և լիովին հրաժարվել նրանից:

Ստեղծագործական զարգացման նոր ճանապարհին Կ. Սիտալը իր ուժերն ամբողջությամբ տալիս է ունույնացիոն պոեզիային, միջազգային պրոլետար-

3 Լ ա ս (Լուիզա Ասլանյան), Հարցականի ուղիներով:

4 Մ. Մ ա ն ու շ յ ա ն, Ի մ եր գը, Երևան, Հայպետհրատ, 1955, էջ 27:

րիատի դասակարգային պայքարին, մերկացնում է իմպերիալիզմի հակաժողովրդական, ագրեսիվ բնույթը:

4. Սիտալը լի է Ամերիկայի դեմոկրատական ուժերի վերջնական հաղթանակի հավատով: Նա գիտե, որ իմպերիալիստական գիշատիչները և պատերազմի հրձիգները, վերջիվերջո, կխորտակվեն, իսկ բանվորները, Ամերիկայի աշխատավոր ժողովուրդը վերջնականապես հաղթանակ կնվաճեն:

Երեսնական թվականների սկզբներին գրական ասպարեզ իջած և գրականության առաջագեմ ուղղությանը հարած նոր երիտասարդության մեջ ամենատաղանդավորը Վահե Վահյանն է: 1933 թ. լույս տեսած «Արև անձրև» բանաստեղծությունների առաջին գիրքը, թեպետ և կրում է իր ուսուցչի՝ բանաստեղծ Վահան Բեքեյանի թախժոտ տրամադրությունների որոշ կնիքը, պարունակում է անձրևային, տխրամած տրամադրություններից արևին անցնելու առողջ ձայներ:

1946 թ. լույս տեսած նրա «Ոսկի կամուրջ» բանաստեղծությունների երկրորդ գիրքն արդեն վճռականապես հաստատում է բանաստեղծության մեջ նոր, գրական սկզբնավորության հաղթանակը. նա կոչ է անում ծառայել կյանքին, պայքարել հանուն վաղվա պայծառ օրվա:

Ինչ որ առի կյանքի հունեն՝ հիմա կյանքին կուտամ կրկին
Ես՝ համայնքին հետ բաբախուն, այլ սոսկ հյուլեն անոր հետին⁵:

Իսկ այս համայնքի մեջ նա արդեն տեսնում է նոր կոփվածքի մարդկանց ծնունդը, որոնք պիտի վերափոխեն կյանքը, «նոր ձևով հերկեին հին հողը»: Նոր պոեզիայի ստեղծման ճանապարհին Վահե Վահյանի առաջին քայլերը վեհերոտ են: Սակայն հաջորդ տասնամյակում նրա ձայնը հնչում է իր ամբողջ ուժով: Հետագայում նա կանգնում է սոցիալիստական ռեալիզմի առողջ դիրքերի վրա:

Գրական այդ նույն ուղղությանը հարեց նաև ամերիկահայ լրագրող-արձակագիր-բանաստեղծ Հակոբ Գուլյումճյանը:

Հակոբ Գուլյումճյանի բանաստեղծությունների կենտրոնական թեման իր ժողովուրդն է, իսկ իր ստեղծագործական ոգեշնչման ակունքը իր սովետական հայրենիքը: Դեռևս 1936 թ. իր «Փոթորիկ» ժողովածուում, «Երկիր իմ, խորհրդային» բանաստեղծության մեջ Գուլյումճյանը գրում էր.

Երջանիկ եմ ես,
Երկիր լուսերես,
Որ բախտը ունեմ
Քեզ միշտ սիրելու, քեզ միշտ ղգալու
Ու փառքիդ մասին
Նորանուն, շքեղ
Երգեր գրելու, քեզմով մեծանալու...⁶

5 Վ ա հ ե Վ ա հ յ ա ն, Ոսկի կամուրջ, Պեյրութ, 1946, էջ 8:

6 Հ. Գ ու լ յ ու մ ճ յ ա ն, Փոթորիկ, 1936:

Հայրենիքի անհուն սերն ու կարոտը Գույումճյանը արտահայտել է իր բազմաթիվ բանաստեղծություններում: Նա պատմում է, որ պանդխտության մեջ մուրացիկի պես է քաղում ամեն ծաղիկ ու կոկոն:

Փակված գտա ամեն դուռ երկինքներու տակ օտար,
Վախով, դողով քալեցի՝ աքսորական ու վտար⁷:

Մինչդեռ կապիտալիստական շահագործումից ու նեխվածությունից ազատագրված իր նոր, հպարտ սովետական հայրենիքում «հաթոք ոսկե արևն» է փայլում, ու մարդն «այլևս ստրուկ չէ»: Այդ նոր հայրենիքին է հավատարմության իր երդումը տալիս բանաստեղծը:

Հակոբ Գույումճյանի արձակը ներդաշնակ է նրա բանաստեղծություններին և կարծես այնտեղ արտահայտված ղգացմունքների շարունակությունն ու զարգացումն է: Նրա արձակ առաջին ծավալուն գործը հանդիսացավ «Արյունոտ անապատը»: Հեղինակն այն կոչել է «Վեպ իրական կյանքե». սակայն դա վեպ չէ իր առումով, այլ՝ մարդկային մեծագույն ողբերգության ականատեսի խիստ հուզիչ հուշագրություններ:

«Արյունոտ անապատը» ինքնակենսագրական բնույթ է կրում: Համարյա արձանագրային ճշտությամբ նա պատմում է իր ընտանիքի կյանքի ու կենցաղի մասին: Գույումճյանը իրական գույներով, միամիտ մանկան շուրթերով պատմում է չսված տանջանքներից բթացած, հոգեվարքի մեջ գտնվող, ոչնչացվող մի ամբողջ ժողովրդի արյունոտ ճանապարհի մասին: Եվ այդ հուզված պատումը դառնում է ցնցող փաստաթուղթ՝ մի ամբողջ ժողովրդի մարտիրոսացման մասին:

Սակայն անցնում են նաև աքսորի ու գաղթականության, փորձությունների և արյունոտ անապատներում դեգերելու տարիները: Պատանի Գույումճյանը հաղթահարելով էլիս-Այլանդ կղզու բոլոր խոշոր դոտները ընկնում է, վերջապես, «Ավետյաց երկիր»՝ հռչակված Ամերիկան: Նրա արձակի երկրորդ ծավալուն գործը՝ «Ահա քեզի Ամերիկան» գիրքը, նույնպես ինքնակենսագրական բնույթի է: Նրանում Ամերիկան ներկայացված է հենց այնպես, ինչպես այն տեսել է դժվարին տանջանքների բովով անցած պատանին: Թվում է, թե գովաբանված արևմտյան քաղաքակրթության աշխարհը պետք է ցնցեր, հափշտակեր, կլաներ անփորձ պատանուն: Սակայն այդպես չի ստացվել: Պատանի Գույումճյանը չի շլանում ամերիկյան կյանքի արտաքին փայլով, ոեկլամ-գովազդների լույսերով: Այդ կյանքի լավ երևույթների կողքին նա կարողանում է տեսնել նաև ծիծաղելի ու այլանդակը: Եվ իր մեղքը չէ, եթե այդ վերջինը ավելի շատ է:

Հեղինակը նկարագրում է ամերիկյան իրականության այլանդակությունները՝ բանվոր դասակարգի շահագործումը, ոստիկանական ռեժիմը, հակակոմունիստական պրոպագանդայի կեղծիքը, ռասսայական խտրության հակամարդկային երևույթները, բարոյական անկումը և դրան հակադրում սովետական Ռուսաստանը:

Սուր, սպանիչ սատիրայով է խոսում հեղինակը դաշնակցականների մասին, որոնք ստորաբար վրպարտում են Սովետական երկիրը: Նա միաժամանակ ցույց է տալիս նաև, որ սփյուռքահայությունը նողկանքով երես է դարձնում

7 Հ. Գույումճյան, Ճեղքված սիրտ, Ֆիլատելֆիա, 1947, էջ 22:

դաշնակցականներից, արժանի հակահարված տալով նրանց, և ավելի ու ավելի է կապվում իր ծաղկող հայրենիքի՝ Սովետական Հայաստանի հետ:

Հակոր Գույումճյանը կարողանում է դիտել կյանքը, ճիշտ ընդհանրացումներ և հետևություններ անել, հաղորդակից դարձնել նրանց իր ընթերցողներին: Սակայն, ինչպես իր շափածո գործերում, նույնպես և արձակի մեջ, նա չի կարողանում հասնել կատարողական արվեստի բարձր վարպետության, սա նրա ստեղծագործության թույլ կողմն է:

Ա. Սեմայի հրատարակած «Մշակույթ» առաջադիմական պարբերականին աշխատակցում էին նաև Պետրոս Զոյրյանը, Սեմայի քույրը՝ բանաստեղծուհի Մարի Աթմաճյանը և ուրիշները:

Միսաք Մանուշյանը, Ա. Սեման, Լասր (Լուիզա Ասլանյանը), Կարապետ Սիտալը սփյուռքահայ հետեղենների գրական զարթոնքի այն առաջին ներկայացուցիչներն էին, որ գրական նոր՝ ռեալիստիկ ուղղության հիմքերն էին դնում: Նրանք սփյուռքահայ իրականության մեջ գաղափարական արվեստի, առաջադեմ գաղափարական գրականության, բարոյական և դաստիարակչական բարձր նպատակներ հետապնդող գրականության ստեղծման առաջին ռահվիրաները հանդիսացան:

Այդ ուղղության ներկայացուցիչները հասել էին քաղաքական մտածողության այնպիսի մի մակարդակի, որը հնարավորություն էր տալիս նրանց այսօրվա կյանքը դիտել գալիքի բարձունքներից և իրենց ամբողջ գործունեությունն ու ստեղծագործությունը ծառայեցնել ապագան մոտեցնելու գործին: Նրանց ստեղծած գրականությունը թևավորված էր դալիքի պայծառ տեսիլքով:

Այդ ուղղության ներկայացուցիչների երկրորդ կարևոր առանձնահատկությունն այն է, որ նրանք չէին ամփոփվում ազգային սահմանափակության նեղ շրջանակներում, այլ դառնում էին համամարդկային գաղափարների և իդեալների արտահայտիչներ:

Իրենց համար ուղենիշ ու զրոշակ դարձնելով իրենց հայրենիքում ստեղծվող սովետահայ գրականությունը, նրա օրինակով նրանք իրենց ստեղծագործությունը հագեցնում էին խորը գաղափարայնությամբ, այն ուղղում էին կապիտալիստական իրավակարգի և սոցիալական անհավասարության դեմ: Այդ գրականությունը ղեռ սոցիալիստական գրականություն չէր, սակայն նա իր մեջ, անշուշտ, արդեն կրում էր սոցիալիստական գրականության առանձին սաղմերը: Ըր առողջ հիմունքներով այդ ուղղությունը զարգացման լայն հեռանկարներ ուներ և այն բուռն ծաղկման հասավ հաջորդ տասնամյակներում: Եվ հենց այդ տեսակետից է, որ նրանց ստեղծած գրականությունը պատմական խոշոր արժեք է ներկայացնում:

Նրանցից շատերի գործերն իրենց ղեղարվեստական արժանիքներով երբեմն չեն հասնում ձևի կատարելության, բայց նրանք կմտնեն գրականության պատմության մեջ, որպես գրական նոր ուղղության ստեղծման շրջանի առաջին հուղիչ գրական վավերագրեր:

Դրա մեջն է հենց նրանց ուժն ու արժեքը:

Գրական այդ ուղղությունը հետագայում 40—50-ական թվականներին կյանքի պիտի կոչեր շնորհալի գրողների մի փայլուն սերունդ՝ Գեղամ Սևան, Գառնիկ Աղղարյան, Արմեն Դարյան, Վահագն Սարգսյան, Սմբատ Տերունյան, Վահրամ Հաճյան, Նշան Շահեն և շատ ուրիշներ, որոնք իրենց ստեղծագործու-

թյան միակ մեթոդը պետք է դարձնեն սոցիալիստական ուսուցիչը, իրենց ստեղծագործությունները հազեցնելով կոմունիստական խորը դադափարայնությունով:

* * *

Նրեանական թվականներին սփյուռքահայ գրականության մեջ գործում էր դրողների մի այլ խումբ ևս, որի մեջ մտնողների մի մասը նոր գրական անուններ են. Բենիամին Նուրիկյան, Վահե Հայկ, Անդրանիկ Անգրեասյան, մյուսներից հին գրական սերնդի վերապրած ներկայացուցիչները՝ Ջարուհի Գալեմբերյան, Լևոն Մեսրոպ, Ջարեհ Պլպուլ, Նադարեթ Մանկունի, Հակոբ Մնձունի և ուրիշներ: Գրական կյանքի ընդհանուր աշխուժացման հետ նրանք ևս ստեղծագործական ակտիվացման որոշ նշաններ են ցուցաբերում: Գրողների այս խումբը չի տարվում գրական նոր մոդեռն ուղղություններով ու մտայնությամբ, հետևում է նաև գրական ռեալիստիկ սոցիալիստական ուղղությունից ու դադափարներից: Հավատարիմ քննադատական ուսուցիչի ավանդներին, նրանք իրենց դրվածքներում օրյեկտիվորեն վերաբնակում են կյանքի իրական պատկերները, հակասությունները, կենցաղային դրվագները: Սակայն արժեքավորն ու գնահատելի նրանց ստեղծագործության մեջ քննադատական պատկերն է այդ կյանքի նկատմամբ և իրենց համակրանքն ու սերը ժողովրդի հասարակ ներկայացուցիչների հանդեպ:

Զգալի տեղ է բռնում նրանց ստեղծագործություններում հին հայկական գյուղն իր նահապետական կենցաղով ու բարքերով, և հայ աշխատավոր գյուղացու շարքաշ, տաժանակիր կյանքը:

Գրական այդ խմբի աչքի ընկնող ներկայացուցիչներից է Բենիամին Նուրիկյանը, որի պատմվածքների առաջին ժողովածուն՝ «Այգեկուտք» խորագրով, լույս տեսավ 1937 թ.: Փոքրիկ, գողտրիկ պատկերներով, մեծ ջերմությամբ ու հուզականությամբ հեղինակը տալիս է սփյուռքահայ պարզ, հասարակ մարդկանց, բանվորների ու գեղջուկների կյանքը, նրանց դառնությունն ու խինդը: Բենիամին Նուրիկյանը խոր համակրանք ու սեր է տածում դեպի իր հերոսները, դեպի հասարակ, աշխատավոր ժողովուրդը: Շատ գրավիչ է նրա ոճի պարզությունը, դիտողականությունը: Բենիամին Նուրիկյանը փորձում է շարունակել արևմտահայ մանրավեպի փայլուն վարպետների լավագույն ավանդները:

Այդ ժամանակաշրջանում գրական ասպարեզ իջավ նաև սփյուռքահայ արդի արձակի լավագույն ներկայացուցիչներից մեկը՝ Վահե Հայկը՝ իր «Հայրենի ծխան» պատմվածքների ժողովածուի առաջին հատորով: Հետագա տարիներին նա այդ նույն խորագրի տակ հրատարակեց պատմվածքների ևս երեք հատոր: Շատ լավ ծանոթ լինելով սփյուռքահայերի կյանքին, նա կարող վրձինով պատկերում է այդ կյանքն իր բարդ ու բազմապատկեր երանգներով, և, ինչպես հատուկ է ճշմարտացի արվեստին, նա իր ընդհանրացումների մեջ դուրս է գալիս ամերիկահայ փոքր գաղութի նեղ սահմաններից և դիմակազերծ անում ժամանակակից կապիտալիստական աշխարհի ողջ սուտն ու կեղծ բարեպաշտությունը, այդ նեխած հասարակության դատապարտվածությունը:

Վահե Հայկի փոքրիկ պատմվածքներում ճշմարտացիորեն արտացոլված է ժամանակակից դրամատիկական հասարակության ստորին և վերին խավերի կենցաղն իր բոլոր հասարակական-տնտեսական հարաբերություններով, թեպետ հեղինակն այդ մասին չի խոսում ուղղակիորեն: Իրեն ուշադիր դիտող-ար-

վեստագետ՝ նա պատկերում է կյանքն այնպես, ինչպես որ այն կա, թողնելով որ ընթերցողն ինքն անի իր հետևությունները: Նույնիսկ այն դեպքերում, երբ Վահե Հայկը ակամա պետք է եղբայրացություն հանի, նա այդ անում է այլաբանական ձևով, երբեմն շատ նուրբ, հազիվ նկատելի հումորով: Հենց դա է, որ նրա պատմվածքները դարձնում է առանձնապես համոզիչ ու ճշմարտացի: Նա գրում է դուլարի ուժի տակ կքած մարդկանց մասին, հասարակության ծախս բարոյականության մասին, ծախված կամ դժբախտ սիրո մասին, փոքր մարդկանց մեծ վշտի մասին:

Սփյուռքահայ դրականության ավագ սերնդի ներկայացուցիչներից Լևոն Մեսրոպյն այդ տարիներին ակտիվ գրական գործունեություն է ծավալում: Բավական երկար ժամանակ Լևոն Մեսրոպը եղել է դաշնակցության շարքերում, սակայն հետագայում հիասթափված խզել է իր կապերը այդ կուսակցության հետ և հանդես եկել նրա ակտիվ մերկացնողի դերում:

Իր «Զարե», «Հաշիշին» վեպերում, «Քերբելայի դիշերները» հեքիաթ-պատմվածքում տվել է ֆեոդալական Արևելքի բարբերի ու կենցաղի դեղեցիկ, իրական պատկերներ: «Կախարդող լեռը և ներգաղթող ձին» վեպը մի փորձ է՝ անցնելու իր համար նոր՝ հայրենադարձության և ներգաղթի թեմային: Լևոն Մեսրոպը Սովետական Հայաստանի ջերմ բարեկամներից է:

Զարուհի Գալեմբերյանը, Հակոբ Մնձունին, Նազարեթ Մանկունին, Զարեհ Պլպուլը, Թորոս Ազատյանը, Լուսինի Մինասը, Վահրամ Տատրյանը, Սարգիս Սահակյանը իրենց բազմաթիվ գործերում տվել են հայկական գյուղական կենցաղի բազմաթիվ գեղեցիկ նկարագրություններ, պատկերներ, խորհրդածություններ:

Նրանց հույսերի աշխարհը հիմնականում մտորումներն են ժողովրդի ծանր ճակատագրի, աշխատավոր մարդկանց շարքաշ կյանքի և տիրող սոցիալական անարդարության մասին:

Այդ խմբի ներկայացուցիչներից Նազարեթ Մանկունին երկար տարիներ աշխատել է Ամերիկայում որպես գործարանային բանվոր, մոտիկից ճանաչել և մտերմացել է ոչ միայն հայ, այլև օտարազգի աշխատավորների ու մտավորականների հետ: Այդ ամենը, հատկապես տարբեր ազգությունների աշխատավորների եղբայրական միասնության թեման, նա դարձրել է իր պատմվածքների նյութը: Իր հերոսների մասին նա գրում է. «Անոնք ես փնտրած, դտած և իմ անպաճույճ լեզվով նկարած եմ: Իմ փոքր հասակես մինչև 72 տարիքս ես անոնցմերնավ շրժանեցա և ոչ ալ անոնք ինձմե: Եվ այս ընկերակցությունը սրտիս ամենամեծ հրճվանքն է պատճառած»: Ն. Մանկունին պատկերում է հետպատերազմյան տաղնապալից կյանքը, տնտեսական ճգնաժամը, նրա ծանր հետևվանքները աշխատավոր մարդկության համար և վերջիններիս անքակտելի բարեկամությունն ու միասնությունը:

«Թումասսո» պատմվածքում նա նկարագրում է Ամերիկայի 1929 թ. տնտեսական մեծ ճգնաժամի տարիներին իտալացի երաժշտագետ Թումասսո Մարթինիի մի կտոր հացի համար մղած տանջալից պայքարը: Այլևոր արվեստագետը տնտեսական տաղնապի հետևանքով կորցնում է իր բարեկեցիկ դրությունը, և որպեսզի սովամահ չլինի՝ հարկադրված է փողոցներում պաղպաղակ վաճառել: Հեղինակը մերկացնում է ամերիկյան դեմոկրատիայի «արդարությունն» ու «հավասարությունը»:

Նույն այդ ճգնաժամի ծանր հետևանքների նկարագրմանն է նվիրված «Մա-

լաթիացի Մինաս» պատմվածքը: Տնտեսական այդ ահավոր ճգնաժամի հետևանքով միլիոնավոր բնտանիքներ քայքայվեցին և հարկադրված եղան իրենց տներն ու կալվածները հանձնել վաշխառուներից վերցրած պարտքի ու տոկոսների փոխարեն: Տնտեսական այդ տաղնապը հազարավոր աշխատավորների մղեց ինքնասպանության: Մալաթիացի Մինասը նույնպես ծանր օրեր ապրեց ճգնաժամի հետևանքով: Մակայն հայ գյուղացուն հատուկ համառությամբ նա դիմադրեց զժվարություններին, մինչև որ Մայր Հայրենիքը ներգաղթի կոչ ուղղեց իր պանդուխտ որդիներին: Մալաթիացի Մինասը ներգաղթում է՝ լսելով «հայրենի աշխարհի արտին, ջրին, թուփին, և աճյունացած պապերու ողբկոչող շունչն ու առինքնող կանչը, որ կուգար հողի ընդերքեն»:

Շատ հետաքրքիր դեմք է երեսնական թվականներին գրական ասպարեզ իջած Անդրանիկ Անդրեասյանը:

Անդրեասյանի մեջ միանում են մանրավիպագիրը և լրագրողը: Շնորհալի հրապարակախոսը գրքից-գիրք աճում է նաև իրրև արձակագիր: Հմուտ և փորձված լրագրողն իր գրական երկերում շարունակում է հրապարակախոսական պայքարը՝ թունոտ ծաղրի ենթարկելով շրջապատող միջավայրի արատավոր ու թշնամական քաղաքական դադափարները և ուղղությունները:

Ա. Անդրեասյանը ևս իր սերնդի մտավորականներից շատերի նման տեսել է կոտորածի ու փախուստի բոլոր սարսափները, ճաշակել է որրի՛ վրկանքներով լի, հյուծող կյանքը: Ըր պատմվածքներում նա հաճախ է դիմում այդ օրերի հիշողություններին, սակայն ոչ թե այդ սարսափների սոսկ արձանագրման, այլ իր հիշողություններն այսօրվա քաղաքական պայքարի նպատակներին ծառայեցնելու համար:

Անդրանիկ Անդրեասյանի պատմվածքներում մեծ տեղ է հատկացված ռասայականության դարշելի քաղաքականության մերկացմանը: Հեղինակը տողորված է ժողովուրդների բարեկամության պայծառ դադափարներով: «Արցունքի կաթիլներ» պատմվածքում Ա. Անդրեասյանը պատմում է ամերիկյան բանակի շարքային զինվոր Ֆիլիպ Ջեկսոնի մասին, որը մեծացել է Ալարամա նահանգում և իր մոր կաթի հետ նա ներծծել է նաև ռասայական բոլոր նախապաշարումները: Նրա հոգեկան աշխարհը սահմանափակված է եղել Ֆուտբոլային ու բեյզբոլային մրցումների և Հոլիվուդի կինո-աստղերի նկատմամբ ունեցած հետաքրքրությունը: Բայց ահա նա ընկնում է բանակ, որտեղ ծանոթանում է տարրեր նահանգներից եկած, տարրեր մաշկ ունեցող, բայց միատեսակ անձնագոհություններ իրենց հայրենիքը պաշտպանող մարդկանց հետ: Բանակի այդ շրջապատում անցկացրած մի քանի ամիսները արմատական փոփոխություններ են առաջացնում նրա հայացքների և պատկերացումների մեջ: Արձակուրդով տուն վերադառնալով՝ նա լսում է հրեաներին և նեգրերին ոչնչացնելու անհրաժեշտության մասին քեռու ճառերը, և, ի մեծ վարմանս իր հարազատների, հակահարված է տալիս իր քեռուն: Հաջորդ օրը նա եկեղեցում տեսնում է, թե ինչպես ռազմաճակատում վիրավորված և բազմաթիվ շքանշաններով պարգևատրված սերժանտը մնում է ոտքի վրա կանգնած, որովհետև սևերին հատկացված բոլոր տեղերը զբաղված են, իսկ սպիտակներին հատկացված ամրոններին, — որոնք դեռևս զբաղված չեն, — նա չի համարձակվի նստել. այդ մասին նրան նախազգուշացնում է պատին փակցված հայտարարությունը: Ֆիլիպ Ջեկոնսը ցուցադրարար տեղից ելնում է և ողջ ժամերգության ընթացքում կանգնած մնում: Նրա օրինակին են հետևում նրա երեք զինվոր ընկերները:

Նրանք բոլորը եկեղեցուց դուրս գալիս՝ զինվորական ողջույն են տալիս նեգր սերժանտին, թեև աստիճանով նա նրանց ստորադրյալն էր:

Իր թեմայով այդ պատմվածքին է ձայնակցում Անդրանիկ Անդրեասյանի «Վարձատրություն» պատմվածքը, որի հերոսը՝ ֆիլիպինցի սպա Ռոգրիգոն Մանիլայի մարտերում արտակարգ անձնվիրություն և հերոսություն է ցուցաբերում: Նա կորցնում է ոտքը, բայց, ի հատուցումն այդ բանի, շքանշանների հետ մեկտեղ նա ստանում է ևս մի պարգև՝ ուղեգիր — ճանապարհորդելու իր րմբոնմամբ, դեմոկրատիայի և կուլտուրայի ավետյաց երկիրը՝ Ամերիկան: Սակայն Ամերիկայում գտնվելու առաջին իսկ օրը նա հանդիպում է ծանր ու դառն հիասթափության: Գնացքում փոքրիկ ամերիկուհին մանկական անմիջականությամբ իր արհամարհանքն է արտահայտում նրան այն պատճառով, որ նա սպիտակ չէ, որովհետև նա հորից լսել է, թե ֆիլիպինցիները կեղտոտ, վատ մարդիկ են: Ռոգրիգոն քաղցած է, բայց նրան ներս չեն թողնում վազոն-ոստորան, որտեղ գերի հիալերականներին ամենայն սիրալիրությամբ սեղաններ են տրամադրել: Հիասթափված և ընկճված Ռոգրիգոն ընդհատում է անհյուրընկալ Ամերիկայով կատարվող իր ճանապարհորդությունը ու վերադառնում իր հարազատ Հուզան կղզին:

Մոայլ պատկերներով մերկացնելով ամերիկյան կենցաղի և բարքերի ողջ հյուծախտը, Անդրանիկ Անդրեասյանը դիմակազերծում է ամերիկյան կեղծավոր «մարդասիրությունը», դատապարտում ցեղապաշտությունը և փառաբանված «ամերիկյան դրախտը»: Մեծ ջերմությամբ են գրված նրա պատմվածքները արհամարհված սեամորթների մասին կամ ամերիկացի առաջադեմ գիտակից այն տարրերի մասին, որոնք հասել են ինտերնացիոնալ միասնության անհրաժեշտության բարձր գիտակցությանը:

Անդրանիկ Անդրեասյանի գրվածքների խոշոր մասը նվիրված է մեծ եղևուների արհավիրքներից փրկված հայ մանուկներին, գաղութահայերի հայրենադարձության թեմային: Ինչպես և Վահե Հայկը, նա մտահոգված է և ահազանգում է սփյուռքահայության լուծման օրավուր աճող վտանգի դեմ պայքարելու մտահոգությամբ:

Այսպիսով Անդրանիկ Անդրեասյանի և ուրիշների գործերի օրինակով մենք տեսնում ենք, որ քսաներորդ դարի քաղաքական-հասարակական մեծ իրադարձությունները իրենց որոշակի կնիքը պիտի դնեն նաև դրական այն հին ուղղության վրա, որ ծանոթ է քննադատական ռեալիզմ անունով: Այդ ուղղության ներկայացուցիչները ևս պատմական նոր ուղիներում ձեռք են բերում ավելի ակտիվ քաղաքական մտածողություն: Նրանց ստեղծագործությունները օբյեկտիվ իրականության պասսիվ հայեցողական սառը վերարտադրումից դառնում են ավելի ակտիվ, միտումնավոր, շեշտվածորեն ու ցցուն ի հայտ են բերում հեղինակի քաղաքական համակրանքները:

Նույն երեսնական թվականներին սփյուռքահայ իրականության մեջ ստեղծվել էր նաև հետադիմական ուղղության մի գրականություն, որն իր բավական ուժեղ արտահայտությունն ունեցավ հատկապես երկու պատերազմների միջև ընկած ժամանակամիջոցում: Ներկայումս այդ գրականությունը խոշոր չափով կորցրել է իր ազդեցությունը, սակայն նրա ներկայացուցիչները դեռ կան, գործում են:

Այդ գրականության ներկայացուցիչների համար բնորոշը դրականությունը կոնկրետ սոցիալական դերից զրկելը, ռեալ իրականությունից կտրելը, իռա-

ցիոնալի՝ բանականության համար անըմբռնելի, ենթակայականի աշխարհը տանելը, այն միստիկականության, երազականության մշուշով պարուրելը: «Ստեղծագործական ազատություն» կեղծ նշանարանի տակ գրականությանն ու արվեստին նրանք հաղորդում են բուրժուական-անարխիստական, անհատապաշտական ոգի, աշխատում զրկել զրականությունը ամեն տեսակի դադափարականությունից և բովանդակությունից: Նրանք գոհակացնում, կոպտացնում են անգամ մարդկային ամենամաքուր զգացումը՝ սերը, պատճառարանելով, որ «Սերը կորսնցուցած է իր ումանթիվը և դարձած շոշափելի», իրը թե ժամանակակից քաղաքի կյանքի պայմաններում վերացել են այդ ումանտիվի՝ բոլոր անհրաժեշտ նախադրյալները՝ «Կր պակսի սոխակը: Կր պակսի նաև Լուսինը՝ նույնիսկ լիալուսին գիշերով՝ էլեկտրական լույսերով բազմագույն և բազմաձև հոսանքներուն առջև»: Եվ քանի որ սերը դառել է շոշափելի, ապա կեցցե մեղկ էրոտիկան, սեկսուալ և անասնական բնավորները: Նրանք տեսնում են իհարկե տիրող սոցիալական անարդարությունն ու հակասությունները, սակայն ոչ միայն չեն մերկացնում ժամանակակից դրամատիքության մռայլ ու դժնի իրականությունը, այլ ընդհակառակը կեղծում են օբյեկտիվ ճշմարտությունը, վարդագույն երանգներ տալիս նրան: Եվ քանի որ սեր սպիտակի տեղ ներկայացնելը այնքան էլ հեշտ չէ, ասպա աշխատում են ներկայացնել ամեն ինչ այնպես, որ իրը շարիքը մարդկային հասարակայնության մեջ այնքան համընդհանուր բնույթ է ստացել, որ զուր է նրա առանձին արտահայտությունների դեմ պայքարելը, պետք է հաշտվել այդ ամենի հետ և շտեսնել, երես դարձնել շարիքից: Պետք չէ վրդովվել, պետք չէ ընդվզել, պետք չէ առհասարակ բանականությանը դիմել: Նրանք անիծում են կյանքը, ներկայացնելով այն որպես համատարած մղձավանջ և իրական աշխարհին հակադրում արստրակցիան՝ վերացականությունը:


Բուրժուական անկումային մտայնության և գրականության բոլոր ձևերը, վերջին հաշվով հանդում են իրականության կեղծմանը: Այդ ուղղության ներկայացուցիչները վերջնականապես կորցրել են հավատը դեպի մարդը, դեպի ամեն տեսակ զրական արժեքները, դեպի բանականությունը, դեպի լավ ապագան:

* * *

Եթե փորձենք հանրագումարի բերել սփյուռքահայ գրականության մեջ այդ շրջանում կատարված սկզբունքային լուրջ ու խոշոր տեղաշարժերը, ապա վրստահորեն կարող ենք արձանագրել, որ սփյուռքահայ գրականության երկու բանականների միջև կատարվել է վճռական ու կարևոր սահմանագծում: Դաշնակցական հետադեմ բանակը, շարունակելով իրեն հատուկ շառլատանությունն ու անամոթ ստախոսությունը, հետզհետե ավելի է մխրձվում մտավոր ու բարոյական նեխման ու քայքայման տիղմի մեջ: Այդ գրականությունը չի տվել ոչ մի նոր անուն, ոչ մի քիչ թե շատ աչքի ընկնող գործ: Մինչդեռ սփյուռքահայ առաջադեմ գրականությունն ամրապնդվում է օրեցօր՝ դեպի իրեն քաշելով նորանոր առողջ ու կենսախինդ ուժեր, տասնյակ նոր անուններ:

Առաջադեմ գրողների ճակատը նույնպես այսօր արդեն իր արտահայտման երկու ընդգծված տարրեր թևերն ունի՝ քննադատական ռեալիզմի ուղղության գրողներ և նոր, վարդացող սոցիալիստական ռեալիզմի գրողներ:

8 «Անդաստան գրականության և արվեստի», Փարիզ, № 6-2, էջ 14-15:



Սոցիալիստական ունեւորման ուղղությունը թեպետ ամենակրթատասարդն է սփյուռքահայ իրականության մեջ, սակայն անվիճելի կերպով այսօր սփյուռքահայ գրականության ամենազարգացող ու լայն հեռանկարներ ունեցող թեև է ներկայացնում: Այդ գրականությունը մեծ շահով աճել է ոչ միայն քանակապես, այլ գլխավորապես իր ներքին պոտենցիալով (ներուժայնությամբ): Այդ գրականության հասարակական ներուժությունը բնորոշվում է հեղինակներին հուզող խնդիրների մասշտաբականությամբ, նշանակությամբ: Համարյա բոլոր սփյուռքահայ գաղութներում արդեն կան ու գործում են նոր մտածողության և առաջադիմական հայացքների գրողներ, որոնք ստեղծում են խորը մարդկային մի գրականություն՝ հագեցած սուր սոցիալական պայթույթով, գեղարվեստական նոր արտահայտման ձևերով, գալիքի հավատով:

Գրողների այս սերունդը արդեն պատկերում է արդիականության նոր հերոսին՝ նոր մարդուն, որն ունի ուժեղ կամք և նպատակասլացություն՝ տիրող անարդարության վերացման նկատմամբ, ունի ակտիվ վերաբերմունք դեպի կյանքը: Նոր հերոսը կոփված է սուր հասարակական-քաղաքական ընդհանրումների բովում և իր բնավորության ու մտածողության մեջ մարմնավորում է սոցիալիստական գծերը: Նա մտահոգված է իր ժամանակակիցների ճակատագրով: Ունի հստակ տեսակետ աշխատանքի ու նրա վերափոխման նկատմամբ: Տեսակետ, որ հնարավորություն է տալիս թափանցել Երևույթների խորքը, տեսնել այն լայն հեռանկարներով: Նոր հերոսը ղեկավարվում է գաղափարական հստակ ու գիտական՝ կոմունիստական շարժանիշներով, այդ պատճառով էլ կարողանում է ճիշտ հասկանալ ժամանակակից հասարակական բոլոր երևույթները:

Սփյուռքահայ սոցիալիստական ունեւորման ուղղության գրականությունը արդեն խոշոր հետք է թողել սփյուռքահայ իրականության մեջ: Իր գոյության փաստով նա տալիս է ստեղծագործական այդ նոր մեթոդի կենսունակության մի նոր ու լավագույն ասպարույց:

Սփյուռքահայ գրականության ներկա սերունդը հանդես է գալիս արդեն ոչ միայն արևմտահայ գրականության լավագույն ավանդների պահպանողի, այլև այն շարունակողի և հարստացնողի դերում:

Սփյուռքահայ առաջադեմ գրողներն այսօր կատարում են մեծ ու շնորհակալ մի գործ, որի համար ժողովուրդը երախտապարտ է նրանց: Մեծ զոհողությունների գնով այսօր նրանք ստեղծում են սփյուռքահայ նոր առաջադիմական գրականությունը: Եվ այդ փաստով արդեն նրանք կմտնեն գրականության պատմության մեջ, որպես մի նոր ու պայծառ շենքի առաջին աղյուսները դնողներ: